

Uumasunik illersuineq pillugu inatsisartut inatsisissaattut siunnersuummut nassuiaatit

Nassuiaatit nalinginnaasut

Tunuliaqutaa

Inatsit manna uumasunik illersuinermit, qimmiuteqarnermit il.il. akisussaanermik Namminersornerullutik Oqartussat tiguserannut atatillugu maleruagassianut atuutilersinneqartunut ilaavoq. Inatsisikkut siunertarineqarpoq periaatsit akuerisaasut ilisimatuussutsikkullu ilisimalikkat naapertorlugit maleruagassianik aalajangersaanikkut tamanut tunngatillugu uumasut inuiaqatigiinni inissisimanerisa pitsaanerulersinneqarnissaasa qularnaarneqarnissaat. Tamatuma peqatigisaanik uumasunik illersuineq pillugu maleruagassiatut aalajangersakkat sunniutigisaasa inuiaqatigiinnut ajoqutaannginnissaat qularnaarneqassaaq. Siusinnerusukkut Kalaallit Nunaanni uumasunik illersuineq pillugu inatsisivimmik peqarsimanngilaq, tamanna maannamut maleruagassaqartitaasimammat ilaatigut Kalaallit Nunaanni pinerluttulerineq pillugu inatsimmik nalunaarutip 4. juni 1986-imeersup § 65-iatigut, taanna uumasunut tamanut atuuttoq, ilaatigullu Qimmit qimuttut kiisalu qimmeqarnek qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi qimmit qitsuillu pineqarnerat pillugu kapitali 5-imi, niuerutiginninneq il.il. pillugit kapitali 8-mi aamma nakkutilliineq uparuaanerlu pillugit kapitali 9-mi aalajangersakkatigut. Inatsimmi kingullertut taaneqartumi uumasunik illersuineq pillugu aalajangersakkani taamaallaat qimmit qitsuillu pineqarput. Kiisalu savaateqarnek hestiuteqarnerlu pillugit Namminersornerullutik Oqartussat nalunaarutaanni, nr. 25, 25. juni 2001-imeersumi aalajangersagaqarpoq uumasunik illersuinermit siunertaqartunik. Tamatumani pineqarput nerukkaatissaateqarnissaq aammalu savanik hestinillu nerukkaasarnermit piumasagaatit aammalu nersutit inaasa aaqqissuunneqarnissaannut piumasagaatit, matumanittaaq savat hestillu inissaqarnissaannut piumasagaatit.

Uumasunik illersuinermit oqartussaaneq Qimmit uumasunillu illersuineq pillugit Kalaallit Nunaannut inatsisikkut Namminersornerullutik Oqartussanit tiguneqarpoq. Inatsit taanna 1. januar 1999-imi atuutilersinneqarpoq.

Nunat arlallit assigiinngitsutigut suleqatigisartakkavut uumasunik illersuineq pillugu inatsisitigut aalajangersagaqarput, Europami nunat amerlanerit ukiuni kingullerni 100-ngajanni aalajangersagaqarput, oqaatigineqarsinnaavoq Danmarkip uumasunik illersuineq pillugu inatsisaat siulleq, inatsit nr. 152, 17. maj 1916-imeersuummat.

Nunanut tamalaanut tunngatillugu uumasunik illersuinermit soqutiginninneq ukiuni qulikkuutaani kingullerni annertusiartorsimavoq, suliassaqarfimmilu tassani inatsiseqartitsinikkut arlalinnik iliuuseqartoqartarsimalluni. Nunani tamalaani uumasunik illersuineq pillugu inatsiseqartitsinermit assersuutitut taaneqarsinnaavoq

nunani tamalaani uumasut assartorneqarneranni Europarådip uumasut illersorneqartarnissaat pillugu isumaqatigiissutaat, uumasuuteqarnissaq siunertaralugu uumasut illersorneqarnissaat, uumasut toqoragassat pillugit illersuinissaq uumasuutillu qujagisat illersorneqartarnissaat. Isumaqatigiissutip killiliussaqaarfiisa iluanni inassuteqaatinik arlalinnik suliaqartoqarsimavoq, ilaatigut savat pillugit inassuteqaatinik.

Siunnersuutip imarisaa

Inatsit uumasunut tamanut, aamma nujuartuusunut, atuuppoq. Inatsisip pingaarnertut siunertaraa uumasut ataasiakkaartut illersorneqarnissaat, uumasunilli uumasoaqatigiisutut paasillugit illersuineq pissaaq pinngortitamik illersuineq pillugu inatsimmi aalajangersakkatigut. Inatsit imaqarpoq aalajangersakkanik aalajangersimalluinnartunik siullertut pingaarnertullu naalliutsitaanissap paarinerlugaanissallu pitsaaliorneqarnissaannik siunertaqartunik, kisianni inatsit sinaakkusiussatut isigisariaqarpoq uumasut illersorneqarnissaannut maleruagassanik allaffissornikkut Naalakkersuisut aalajangersaanissaannut piginnaatitsissutaasoq. Tamanna uumasunik illersuinermi mianerisassat pitsaanerusumik isumagineqarnissaasa periarfissinneqarnissaata kissaatigineqarneranut takussutissaavoq, tamannalu inatsisissatut siunnersuutikkut isumagineqarpoq, tassa uumasunik illersuinermik suliaasaqarfimmi pissusiviusut ilisimatuussutsikkullu paasisat nutaat uumasut ilorrisimaarnissaannut pingaaruteqartut naapertorlugit maleruagassiat ingerlaavartumik naleqqussarneqarsinnaanerit periarfissinneqarmat. Taamaatumik uumasut naalliutsinneqarnissamut isumannaariffigineqarnerat kisimi siunertarineqanngilaq aammali uumasut pisariaqartitaat assigiinngitsut mianeralugit inatsit malillugu maleruagassianik aalajangersaasoqarsinnaalerpoq.

Inatsip akuersissutigineqarnerani maanna aallaaniariaatsinik piniariaatsinillu allannguisoqarnaviannngilaq, tamatumani suliaasaqarfimmi Naalakkersuisut nalunaarusiornermi malittarisassanik nutaanik aalajangersagaliornissaat piumasqaataassaaq.

Inatsisissatut siunnersuutip suliarineqarnerani uumasunik illersuinermik suliaasaqarfiup pisariaqanngitsumik allaffissorfiunerujussuanik kinguneqartussat maleruagassiat ilanngunnaveersarneqarsimapput, aammattaaq kissaatigineqarsimannngilaq uumasunik illersuinermit naapertuutinngitsunik pisortanut imaluunniit innuttaasunut aningaasartuuteqalersitsisinnaasunik siunnersuutinik saqqummiussinissaq.

Tusarniaaneq

Siunnersuut 22. juli 2002-mi tusarniaassutigineqarpoq 1. oktober 2002-mi akissuteqaateqarnissamut killiliiffigalugu.

Siunnersuummut ukunannga oqaaseqaateqartoqanngilaq: Peqqinnissaqarfimmik Nakkutilliisoqarfik, Kultureqarnermut, Ilinniartitaanermit, Ilisimatusarnermut Ilageeqarnermullu Pisortaqarfik, Kalaallit Nunaanni Aalisartut Piniartullu Kattuffiat aamma Kangilinnguani aalisarnermut piniarnermullu nakkutilliisoq.

Peqqissutsimut Pisortaqarfik uumasut nakorsaasarnermut ilisimatusarnermi akuutinneqartarnissaat pillugu apeqquteqarpoq. Siunissami taamaattoqalernissaanik pisariaqartitsisoqalissappat, suliassaqarfik tamanna uumasunik misileraanermik inatsimmi aalajangersarneqarsinnaalissaaq, soorlu ilaatigut Danmarkimi taamaattoqartoq.

Pinngortitaleriffik bioteknologi pillugu immikkoortumut oqaaseqaateqarpoq. Uumasunik illersuineq pillugu inatsisissatut siunnersuummut § 12-imut oqaaseqaatini bioteknologiip qanoq paasineqarnissaa nassuiaatigineqarpoq, tekniikkilla taakkua illersorneqarsinnaasumik pisuni suni atorineqarnissaat paasineqassanersoq.

Aalisarnermut, Piniarnermut, Aallaaniarnermut Nunaqarfinnullu Pisortaqarfiup Inatsisartut inatsisaanni uumasut tamat pineqarnersut apeqqutigaa, tamannalu Inuussutissarsiornermut Pisortaqarfiup nersutit nappaataannut immikkoortoqarfiata 30. juni 2003-mi allakkamini uppersarpaa. Aalisarnermut, Piniarnermut, Aallaaniarnermut Nunaqarfinnullu Pisortaqarfiup ilisimatitsissutigaa, uumasunik illersuineq pillugu Inatsisartut inatsisissaattut siunnersuummi § 9-mi aamma § 14, imm. 2-mi aammalu piniarneq aallaaniarnerlu pillugit inatsimmi nr. 12-imi, 29. oktober 1999-imeersumi § 8-mi aamma § 11-mi assigiissunik allasimasoqartoq.

Kalaallit Nunaanni Politimesteri inatsisissatut siunnersuutip imarisaanut oqaaseqaateqanngilaq, oqaaserli "pillaaneq" eqqortumik oqaasertaligaanngilaq, oqaasermi taanna kalaallit pinerluttaalisitsinermit inatsisaani atorineqanngimmat. Oqaasertaliunneqartoq uumasunik illersuineq pillugu Inatsisartut inatsisissaattut missingutaanni kingullermi allannguuteqartinneqarpoq.

Kalaallit Nunaanni Kommuneqarfiit Kattuffianniit qimmit qimuttut tuloriaajarneqartarnissaannik inerteqquteqalersinnaaneq apeqqutigineqarpoq. *Qimmiuteqarneq pillugu Landsrådp ileqqoreqqusaa 22. juni 1957-imeersumi Landsrådp ileqqoreqqusaani 4. marts 1959-imi allannguuteqartinneqartumi* paragraffit 6 aamma 7 naapertorlugit inuit kiineqarujussuarnermikkut ajoqusitsaaliornarlugit ukiuni arlalinni qimmit qimuttut tamarmik tuloriaajarneqartarnissaannut piimasaqaateqartoqartarsimavoq. Taamatulli periaaseqarneq pisuni arlalinni qimminut peqqinnissamut tunngassuteqartuni kigutikkut allerukkullu aseruuttoorujussuarnermik kinguneqarsinnaavoq, taamaattumik uumasunik illersuinermit tunngatillugu tamanna eqqarsarialersitsivoq. Taamaattumik tuloriaajaasarnermut taarsiullugu periaatsinik allanik ujartuinissaq misissorneqartariaqarpoq. Siornatigut Namminersornerullutik Oqartussat nersutit nappaataannut immikkoortoqarfiata Peqqinnissaqarfimmik Nakkutilliisoqarfik peqqusimavaa tuloriaaasarnerup unitsinneqarsinnaanera pillugu oqaaseqaateqaqullugu. Peqqinnissaqarfimmik nakkutilliisup 17. august 1995-imi allakkamini tuloriaajaasarunnaarsinnaanissaq pillugu nangaarpalunnini

erseqqissaatigaa, imaattunimmi allagaqarami: "*Qimmit qimuttut tuloriaajartarnissaasa ingerlaannarnissaa naammagintuutippara, tamannami inuit inuunerannik annaassisinnaalluarmat kiisalu qimmit kiisinerisa kingunerannik ikilersitsisarnernik ikilisitsisinnaammat. Isumaqaanngilangali, tuloriaajaasarneq kisimi pineqartariaqaanngimmat, tuloriaajaanermi qimmit kiisinerisa kingunerannik ikilersitsisarnernik ikilisitsinissamat maleruagassat ataatsimoortut ilaattut isigisariaqarluni, qimmit pitussimasarnissaat pillugu maleruagassanik kiisalu qimmink qimuttuuteqarnermut atatillugu pinaveersaartitsineq pillugu innuttaasunut ilisimatitsisarnissamat. Naggataatigut erseqqissaatigissavara, isumaga malillugu tamatumunngattaaq atatillugu uumasut pillugit ileqqorissaarnissap annertusineqarnissaa pisariaqartinneqarpoq. Tamatumani tulriaajaasarneq erseqqissumik pineqarpoq illersorneqarsinnaasumik periuseqarluni ingerlanneqartariaqartoq, qimmiutillilli namminneq qimmiminnik qimuttunik paarsisarnerisa pitsaanerulersinneqarnissaat pisariaqarpoq".*

Naalakkersuisut Allattoqarfiata akissummini erseqqissaatigaa, Kujataani savaatillit savaaraatimik namminneerlutik kinguaassiorsinnaajunnaarsinneqartarnissaanut suli periarfissaqarnissartik kissaatigigigaat, maannami sumiiffimmi nersutit nakorsaqaarnera eqqarsaatigalugu suliap tamassuma nersutit nakorsaannik isumagineqartarnissaa periarfissaqaanngimmat. Inatsisissatut siunnersuummi § 16, nr. 1-imi aamma nr. 2-mi allassimasutut, Naalakkersuisut pilattaanissamat malittarisassanik aalajangersaasinnaapput, tassunga ilaalluni kinguaassiorsinnaajunnarsitsinernik, pilattaanerillu ilaat taamaallaat nersutit nakorsaannit allanilluunniit ilinniagalinnit suliarineqarsinnaasassasut. Tamatumani ilaatigut savaatillit eqqarsaatigineqarput namminneq nersutaatimik kinguaassiorsinnaajunnaarsittarnerannik misilittagaqartunik taamaaliortarnissaminnillu nangitsiinnarsinnaasunik. Kingorna inunnet siunissami taamatut pilattaasarnissamat akuersissutinik pissarserusuttunut piumasaqaasiortoqartarsinnaassaaq.

Inatsisileriffik, Naalakkersuisut Allattoqarfiat, oqaaseqaatinik arlalinnik saqqummiussaqaarpoq, ilaatigut naqinneqarnerani ilusilerneqarneranut, ilaatigut paragraffinut ataasiakkaanut ilaatigullu inatsisissatut missingiummut oqaaseqaatinik. Oqaaseqaatit taakkua ilanngunniarneqarsimapput. Maanna erseqqilluinnalerpoq inatsisip siunertaata pingaarnersarigaa uumasut illersorneqarnissaat, siunnersuutip Kalaallit Nunaanni takornariaqarnerup siuarsarneqarnissaanik siunertaqartariaqaraluarnera ilanngunneqarsimanngilaq. Uumasunik illersuineq pillugu siunnersuisoqatigiinnik pilersitsinissamat siunnersuut peerneqarsimavoq, inatsisileriffiummi erseqqissaatigimmagu, naalakkersuisut qanoq ilisukkulluunniit siunnersuisoqatigiinnik pilersitsisinnaasut, naalakkersuisut taamaattunik pilersitsisoqarnissaa pingaaruteqartutut nalilerpassuk.

Aningaasatigut allaffissornikkullu sunniutissat

Inatsisissatut siunnersuut maannatut iluseqarluni aningaasartuutit eqqarsaatigalugit sunniuteqaataanaviannigilaq, nakkutillineq Naalakkersuisunit peqqussutaasoq

Inuussutissarsiornermut Nunalerinermullu Pisortaqarfiup ataani inissisimasumi Namminersornerullutik Oqartussat nersutit nappaataannut immikkorta qarfimmi uumasut nakorsaannit ingerlanneqartussaammat, aamma ilisimatitsissutigineqarpoq ukiuni aggersuni aningaasatigut aamma/imaluunniit inuttaqartitsinikkut nukissanik uumasut nappaataannut immikkoortorta qarfimmu nuussisoqarnavianngitsoq.

Siunnersuummi aalajangersakkanut ataasiakkaanut nassuiaatit

§ 1-imut

Aalajangersagaq inatsisip siunertaanik erseqqissaataavoq, soorlu tamanna nassuiaatini nalinginnaasuni aamma atuarneqarsinnaasoq. Aalajangersakkat Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaannut nr. 18-imut, 30. oktober 1998-imeersumut assingusuupput, maannali uumasunut tamanut tunngatinneqalerlutik. Aalajangersakkat ilanngunneqarput ileqqorissaarnissaq uumasunillu illersuinissamut tunngassuteqartut eqqarsaatigalugit uumasuutit illersorneqarsinnaasumik passunneqartarnissaat pillugu. Ilusilersorneqarnera nunani killerni allani aalajangersakkanut naapertuuppoq.

Oqariaatsit naalliutsitsineq, anniaateqarneq ersiortitsinerlu timikkut allatigullu sunniisarnermut, uumasut nalaassinnaasaannut tunngassuteqarput. Oqariaatsimi kingunipiloqartitsisumik ajoqusernermi illersuineq anniaateqalernerinnarmut tunnganngilaq. Tamatumani nersutip kingunipiloqartitsisumik ajoqutissarsinissaa pineqarpoq. Taamatuttaaq nersutip sapinngisamik annertuumik akornusersunnginnissaa illersorneqassaaq. Kingunipiloqartitsisumik ajoqutissarsisitsinnginnissamik piumasaqaat assersuutigalugu tassaavoq siutikkut nalunaaqutsiinermi (ilaatigut savaaqpanik) ajoqutissarsisitsinerit, perlerornermut kapuinermi ujalutigut aseruuttoornerit aammalu aalajangersakkat atuuffiitut ilaatinneqanngitsumik aassiuinerit ataasiakkaat. Oqaaseq "sapinngisamik" ilaatinneqarpoq nassuerutigisariaqarmat pisuni tamani uumasup anniaateqarnissaa il.il. pinngitsoorneqarsinnaasassanngimmat.

§ 2-mut

Aalajangersakkakkut erseqqissarneqarpoq inatsimmi uumasut suulluunniit nunamiikkalluarpata aalisarnermilu imartamiikkalluarpataluunniit pineqartut. Taamaattumik inatsisip atuuffii tassaapput uumasut suna siunertaralugu uumasuutigineqarnerat apeqqutaatinnagu inunnit uumasuutigineqartut uumasullu pinngortitami uumasuusut.

§ 3-mut

Aalajangersagaq Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq uumasunulli tamanut atuutsinneqalerluni. Pineqarput kikkulluunniit uumasuuteqartut, nunalerinermik siunertaqarpat, uumasut suliaqartitat pineqarpata, nuannaralugit uumasuutit pineqarpata, allatulluunniit uumasuuteqarneq pineqarpat. Nunalerinermi siunertat ima paasineqassaaq nerisassanik piliornissaq, meqqunik, amminik imaluunniit amminik meqqui atasunik nioqqutissiornissaq siunertaralugit uumasuuteqarneq, nunalerinermiluunniit allatut atorineqartut pineqarpata. Uumasunut suliaqartitanut assersuutitut taaneqarsinnaapput qimmit qimuttut sulinermullu atatillugu qimmiutit.

Erseqqissumik oqaatigineqarpoq uumasut immikkut pisariaqartitaat naapertorlugit pineqassasut. Naliliinermi mianerineqassapput uumasup suunera, qanoq ineritsigisimanera, uumasuutiginneriaatsimut atukkaminut qanoq naleqqussartigisimanera nujuissusialu. Oqaatsit "periaatsit akuerisaasut ilisimatuussutsikkullu ilisimalikkat" malugineqassapput, taakkunuuna qularnaarneqarpoq assersuutigalugu qimmit qimuttut ukiuni untritolikkutaani Kalaallit Nunaanni atugaaneranni paasisimalikkat qimmit paarineqarnissaanni najoqqutaalluarsinnaaneri. Tamanna aamma isumaqarpoq paasisimalikkat nutaat naapertorlugit peqqissaartumik isumaginninnissamut piunasaqaatit allangortinneqarsinnaanerannik. Isumaginnittussaataitanerutaaq ilagaa nuunnerni assigisaannilu § 3-mi uumasut ilaatinneqartut qimaannarneqartannginnissaat. Tamanna nuannaralugu uumasuutitut pingaaruteqarluinnarpoq. Qanorluunniit aalajangersakkami toqqaannartumik erseqqissaatigineqanngikkaluarpalluunniit, peqqissaartumik isumaginninnissamut piunasaqaatit isumaqarput, kinaluunniit uumasunik paaqqutarinnittoq uumasumik akulikitsumik nakkutiginninnissamut. Qanoq nakkutiginnitsiginissaq aalajangersakkami erseqqissaatigineqanngilaq. Tamatumani apeqqutaasariaqarpoq uumasup suussusia, utoqqaassusia qanoq issusia il.il., uumasunillu piginnittup ataasiakkaap uumasutimi peqqissaartumik isumaginissaanut qanoq sivisutigisumik pisariaqartitsinersoq. Peqqissaartumik isumaginninnissamut piunasaqaatit aammattaaq nappaatinut illersuinissamut katsorsaanissamullu atuupput.

§ 4-imut

Oqaatsimi illu paasineqassaaq illup ilusilersugaanera, matumanittaaq iigai, qilaava qalialu. Oqaatsimi ini paasineqassaaq sumiiffik uumasup uumasulluunniit uninngaffigisaat, assersuutigalugit talusat nersutit inaat imaluunniit ungalusaq. Oqaatsimi nunaminertat paasineqassaaq sumiiffiit allat uumasuuteqarfiusut assersuutigalugu illumiuunngitsoq imaluunniit ungaluliukkat nersutaasiviit. Illut ilusiligaaneranni pineqartunut ilaapput assersuutigalugit pequsersuutit, silaannarissarfiit nerukkaaviillu.

Uumasut nikerarnissaminut pisariaqartitaat assigiinngillat, naliliinermilu immikkut pingaartinneqartariaqarput uumasup pissusilersornissaminut pisariaqartitai.

Panertumi nalaffissaqarnissaannik aalajangersagaq Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq uumasunulli tamanut atuutsinneqalerluni. Inatsisartut inatsisaanni aalajangersagaq ilanngunneqarsimavoq qimmit qimuttut pineqarnissaat siunertaralugu, tassa ilisimaneqarmat upernaat tamaasa qimmiliviit ilaat taserannguuttartut.

§ 5-imut

Ullut tamaasa nakkutilliisoqarnissaannik aalajangersagaq Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq uumasunulli tamanut atuutsinneqalerluni. Uumasut peqqissaartumik isumagineqarnissaannik piumasaaqatip, tak. § 4, aamma nassataraa uumasut akuttunngitsumik alakkarneqartarnissaat qularnaarniarlugu pisariaqartitaat naammassineqarnerisut, matumanittaaq napparsimanersut ajoqusersimanersulluunniit paasinjarlugu, pineqarportaaq qimmilivimmi qimmit kalunnerisa ilaruttoorsinnaanerat, qimmit pituussaartoorsimasinnaanerat il.il. Qanoq nakkutilliitigisoqarnissaanut aalajangiisuusariaqarput uumasup suunera, utoqqaassusia qanorlu innera il.il., taamaattumik pisut ilaanni ullormut ataasiaannarani nakkutilliinissaq pisariaqartarsinnaavoq. Imm. 2-mi pineqanngillat qimmit aasaanerani qeqertaniitinnegartartut. Nassuerutigisariaqarporli pisut ilaanni ullormut nakkutilliinissaq ajornakusoorsinnaammat, assersuutitut taaneqarsinnaavoq savanik nakkutilliineq, taakku aasaanerani nunami nammineersinneqartarmata. Taakkuli akuttunngitsumik alakkarneqartariaqarput sapinngisamillu pitsaanerpaamik uumasunut nujuartunut illersorneqartariaqarlutik. Oqaatsisigut "sapinngisamik pitsaanerpaamik" takutinniarneqarpoq uumasut nunami nammineersitat uumasunut nujuartunut illersorneqarnissaat tamatigut pisinnaanngimmat. Illersuinermut assersuutitut taaneqarsinnaavoq savaatillit savanik savaaqqanillu nunami namminiilersitsisarmata aatsaat savaaqqat ima imalu pisoqaassuseqaleraangata. Tamanna pisarpoq savaaqqat erniorlaat nattoralinnit saassunneqarnissaat pinaveersimatinniarlugu.

§ 6, imm. 1, nr. 1-imiit 3-mut

Aalajangersakkakkut uumasuuteqarnerit suulluunniit assigiinngitsut pillugit maleruagassanik allaffissornikkut aalajangersaanissamat Naalakkersuisut piginnaatinneqarput. Ineriartornerup tamanna pisariaqalersissappagu inuussutissarsiuutigalugu uumasuuteqariaatsit ilaasa ukiumut ikinnerpaamik ataasiarluni uumasut nakorsannit alakkartinneqartarnissaat pillugu, imaluunniit sumiiffinni piginnittup imaluunniit uumasunik nakkutilliisup najugaqarfiginngisanni uumasuuteqarneq pillugu, maleruagassanik aalajangersaanissaq

pisariaqalersinnaavoq, tak. imm. 1, nr. 1 aamma 2. Imm. 1, nr. 3-kkut uumasut init sumiiffii, matumanittaaq inissaqarnissaat pillugu pequsersuutillu pillugit §§-ni 4 aamma 5-imi taaneqanngitsut pillugit erseqqinnerusunik maleruagassanik aalajangersaanissaq periarfissinneqarpoq. Aalajangersakkakut Naalakkersuisut piginnaatinneqarput piumasagaatinik taamaattunik allaffissornikkut aalajangersaanissamut, ingerlatsisarnermili nalinginnaasumi ileqqorineqarpoq, soqutigisaqatigiit sinniisuutitalluunniit maleruagassanut nutaanut attuumassuteqartut tusarniaaffigineqarnissaat.

§ 6, imm. 1, nr. 4-mut

Ukiuni kingullerni nalinginnaaleriartorsimavoq nuannaralugu uumasuutinit nalinginnaasunit allaanerusunik inuit namminneq uumasuteqartarnerat, matumani pineqarlutik uumasut nunanit allaneersut imaluunniit uumasut nujuartut, soorlu qaasuttut anginerit, taakkununga ilanngullugit timmissat tigutsisillit, pulateriaarsuit aasiaallu. Aalajangersakkakut Naalakkersuisut piginnaatinneqarput uumasut ulorianaateqartut, ersiortitsisinnaasut imaluunniit uumasunik illersuineq eqqarsaatigalugu isumannaatsumik uumasuutigiuminaatsunik pigisaqarnissap inerteqqutigineqarnissaa pillugu maleruagassanik aalajangersaanissamut. Taamaattumik eqqarsaatigineqarsimapput uumasunik illersuinermi mianerisagiaqakkat aamma isumannaallisaanissaq avatangiisillu qisuariaateqarnissaat. Kingullertut taaneqartumut atatillugu uumasut ulorianaateqavissut, assersuutigalugu pulateriaarsuit toqunartullit aammali uumasut nalinginnaanngitsumik isikkoqarnertik imaluunniit uumasunut toqunartortalinnut assingunertik pissutigalugu ersiortitsisinnaasut pigineqarnissaat inerteqqutigineqarsinnaavoq. Piginnaatitsissut taamaangajattoq nunanit arlalinnit atorineqarpoq qimmit saassusseratarsinnasut, soorlu pit bull terrierit aamma tosat pigineqarnissaasa inerteqqutigineqarnerat.

Oqaatigineqassaaq Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi § 10 naapertorlugu qimmit kiisortut pigineqarnissaat inerteqqutaasoq. Aalajangersakkami tassani saassusseratarsinnaasuunngitsup kiisortuunngikkaluartalluunniit nalaassinerliornikkut kiisortuunngorsinnaanera miarinerineqanngilaq. Taamaattumik aalajangersagaq taanna uumasumut ataatsimut uumasoaqatigiunngitsunullu sammisitaavoq.

§ 6 imm. 1, nr. 5-imut

Ungalusani manniliortitsivinni ilisimaneqartuni kukkukuujuteqarneq uumasunik illersuineq eqqarsaatigalugu isumakulunnartuuvoq, tassa periaatsip taassuma kukkukuut pisariaqartitaat arlallit naammassisissinnaanngimmagit, soorlu assersuutigalugit ulluni manniliorsinnaaneq, pujoralatserluni imminut salinneq mitsimaarfeqarsinnaanerlu. Kiisalu kukkukuut inikillioartarput assersuutigalugu

sulugissarsinnaanatik. Tamatumunnga takussutissaavoq ungalusani manniliortitsiviit ilisimaneqartut ukiut arlalippassuunngitsut ingerlaneranni EU-mi inerteqqutaalernerat. Pissutsit allat uumasunik illersuinermit pingaaruteqarnerusorineqartut periutsimik taamaattumik atuinissamut tunngavissaasinnaappata pisariaqarsorinarpoq pisuni ataasiakkaani akuersissummik qinnuteqaateqartarnissaa akuersissutillu taamaattup killilimmik tunniunneqartarnissaa.

§ 7-mut

Sungiusaatigalugu aallaariaqattaarnek paasineqassaaq nakernerulerumalluni eqqoriagassanik aalajangersimasunik eqqarnermik sungiusarnek. Tamanna qoorortuumik, aallaammik, illuinnarsuummik assigisaannilluunniit pisinnaavoq. Aallaasersorluni unammissuteqarnek paasineqassaaq, allanik peqateqarluni kia nakernerunera paasiniarlugu eqqoriagassamut aallaariaqattaarnek.

§ 8-mut

Aalajangersakkap siunertaraa uumasut nammineersinnaasuunngitsut pinngortitamut nunalisinneqannginnissaasa qularnaarneqarnissaat. Uumasut nujuillisarnekarsimasut pinngortitamut nunalisinneqarnissaat kissaatigineqarpat Naalakkersuisut akuersissutaatigut qularnaarneqartariaqarpoq nujuillisaariaatsitigut nunalisitseriaatsitigullu uumasup uumaannarnissaminut periarfissaqarnissaa qularnaarneqassasoq. Tamanna aamma atuuppoq uumasunut nujuartunut pinngortitamiit tigoorarneqartunut.

§ 9-mut

Aalajangersagaq maannakkut pisariaqarpallaanngilaq, kisiannili nunani allani nerlernik aammalu nerlerit qeertuullu ilaannik akusanik pinngitsaaliilluni nerukkaasoqartarnera (nerisitsisoqartarnera) pissutigalugu aalajangersakkap ilanngunneqarnissaa naleqqutsinneqarsimavoq. Uumasut napparsimasut pisariaqarnera malillugu nerukkarneqartarnissaat, aamma pinngitsaaliinikkuugaluaq, sulii qularnaarsimaneqarpoq. Pinngitsaaliilluni nerukkaasoqartarnera paasineqassaaq, uumasut atortulersorluni pinngitsaalillugit nerukkarneqartarnerat, nerukkaatissanik uumasup nammineerluni nerisinnaasai sinnerlugit nerukkaaneq.

§ 10-mut

Aalajangersakkakkut uumasut tigusariniarneqarnerminni assartorneqarnerminnilu pitsaasumik illersorneqarnissaat qularnaarniarlugu maleruagassanik erseqqinnerusunik allaffissornikkut aalajangersaanissamut Naalakkersuisut periarfissinneqarput. Nunani allani paasisimalikkat takutippaat uumasunik assartuineq innuttaasunit arajutsiniarneerukkiartuinnartoq ukiullu ingerlanerini uumasut toqoragassat assartorneqarnerini pissutsit uumasunik illersuineq eqqarsaatigalugu akueriuminaatsut takutinneqartalersimanagerat. Uumasut toqoragassat amerlasuunngorlugit akuerineqarsinnaasumik assartorneqartaraluartulluunniit innuttaasut akornanni oqallisaangaatsiartarpoq uumasunillu illersuinaqatigiit tungaanniit sakkortuumik qisuariaatigineqartarlutik piumasaqaatigalugu maleruagassat sakkortunerit atorneqalernissaat aammalu piffissap assartuinnermut atorneqartup sunniuteqarnerusunik nakkutigineqarnissaa pitsaanerpaanissaalu piumasaqaatigineqartarluni. Kalaallit Nunaanni uumasut toqoragassat assartorneqartartut tassaanerupput savaaqqat tuttullu, taamaattumik assartuineq pillugu maleruagassanik taakkununga sammititanik aalajangersaanissaq pisariaqassaaq. Savat/savaaqqat assartorneqartarnerat pillugu ilisimatuussutsikkut paasisimalikkat amerlapput, tamakkuli nunaannakkut angallassinermik tunngaveqarnerupput, taamaattumik tamatumani maleruagassanik aalajangersaanermi Narsami toqoraavimmut assartuisarnermi paasisimalikkat pioreersut pingaartinneqartariaqarput. Aalajangersakkakkut qimmit qimuttut assartorneqartarnerannut atatillugu maleruagassanik erseqqinnerusunik aalajangersaanissamut Naalakkersuisut aamma periarfissinneqarput.

Uumasunik tigusarinninniarniq pillugu maleruagassanik allaffissornikkut aalajangersaasoqassappat tamakku uumasunut tamanut atuutsinneqarsinnaapput. Assersuutigalugu uumasunik nunalerniq siunertaralugu uumasuutigineqartunik, soorlu savanik tuttunillu, tigusarinninniarniq aammalu uumasut nujuartut, assersuutigalugu umimmaat nuunneqarnissaat nalunaaqutserneqarnissaalluunniit siunertaralugu tigoorneqartut, pillugit maleruagassanik erseqqinnerusunik aalajangersaanissaq pisariaqarsinnaavoq.

Atortulersuutit atorneqarnissaasa inerteqqutigineqarnissaannut piginnaatitsissut atorneqassappat aamma tamakku pisiareqqusaarneqarnissat, nioqqutigineqarnissaat nioqqutiginiarneqarnissaalluunniit inerteqqutaasoq aalajangersarneqartariaqarpoq. Tamatumuuna uumasunik illersuinnermi mianerisassat inerteqquteqarnermut tunngaviusut sunniuteqarnerpaamik eqquutsinneqarnissaat qularnaarneqarpoq. Assersuutitut taaneqarsinnaapput qimminik sungiusaanermi qungasequtitut atorneqartartut ilaat.

§ 11, imm. 1-imut

Oqaluttuarisaaneq eqqarsaatigalugu bioteknologi tassaavoq tunisassiornermi uumassulinnik atortoqartarsimanagera, assersuutigalugu immussualiornermi, alkoholiornermi akiuussutissiornermi imaluunniit puulukiniit aqajaqqup sanilequtaaniit sukkortunut nakorsaassiornermi atuisarsimaneq. Ullumikkut uumassusillit uumasullu pisinnaasaasa allannngortinneqarnissaat siunertaralugu

bioteknologi molekylərbilologiimi ilisimatusarnermut genteknologiimi geninik ikkussisarnermi atorreqartarpoq. Periutsit taakku ineriartupiloortitsiviupput, paasisimalikkallu takutippaat periutsit taakku ilaat uumasunik illersuineq eqqarsaatigalugu ajornartorsiutinik nassataqartartut. Pingaarnertulli oqaatigisariaqarpoq, bioteknologi iluaqutsiullugu inuit pisariaqartitaat pingaaruteqanngitsut siuarsarniarlugit uumasut artorsaatissinneqarnissaat akuersaarneqarsinnaanngitsoq, assersuutigalugu uumasuniit nerisassiassanik tunisassiornerup pitsaanerulersinneqarnissaani. Taamaattorli bioteknologi uumasunik misileraanermut atatillugu akuersaarneqarsinnaavoq, naak tamanna uumasunut artorsaatissiisagaluartoq, inuit soqutigisaat pingaaruteqarluartut pineqaraangata.

§ 11, imm. 2-mut

Matumuunakkut Naalakkersuisut periutsinik uumasunik illersuineq eqqarsaatigalugu isumakulunnangitsunik atuinissamut akuersissuteqarsinnaanerat periarfissinneqarpoq.

§ 12-imut

Aalajangersakkap kingunerissavaa erniortitsinerit imaluunniit erniortitseriaatsit uumasunut naalliutsitsisinnaasut ajoqutaarujussuarsinnaasulluunniit pinngitsoortinnissaannut maleruagassanik allaffissornikkut Naalakkersuisut aalajangersaasinnaanerat. Erseqqissarneqarpoq piginnaatitsissut pissusissamisoortumik atortulerluniluunniit erniortitsinermut atuuttoq. Siunertarineqarpoq pisariaqalerpat maleruagassanik aalajangersaasinnaaneq qularnaarniarlugu erniortitseriaatsit uumasunik illersuineq eqqarsaatigalugu ajornartorsiutinik, matumanittaaq assersuutigalugu uumasunik ajornartorsiorujussuarluni erniorsinnaasunik, iloqissertitsisinnaasunik imaluunniit nappaatinut akiuussutissaqarpiangitsunik, takorloorneqareersinnaasunik pinngitsoortitsisinnaasut qularnaarniarlugit.

§ 13-imut

Aalajangersagaq Qimmit qimuttut kiisalu qimmeqarnek qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq uumasunullu tamanut atuutsinneqalerluni. Uumasunik toqutitsinerup piaarnerpaamik naalliunnanngitsumillu pinissaa pissusissamisoortuusariaqarpoq. Sumiiffiilli ilaanni ileqqusimavoq qimmit nivinngarlugit toqutinneqartarnerat. Periuseq qimitsinikkut toqutitsinermut assinguvoq, isiginnaartuusinnaasunullu nuanniitsuusinnaalluni taamaattumillu uumasut qanoq pineqartariaqarnerannut aalajangersumik periutsinut pingaarnernut assortuuttutut isumaqarfigisariaqarluni. Uumasunik imarmiuunngitsunik ipititsineq uumasup naalliorujussuarneranik

ersiortinneqarujussuarneranillu nassataqassasoq naatsorsuutigisariaqarpoq. Taamaattumik aalajangersakkakut uumasunik sorliugaluartunilluunniit qimitsinikkut nivinngaanikkulluunniit aammalu uumasunik imarmiuunngitsunik ipititsinikkut toqutitsinerit inerteqqutigineqarput. Qassutinik puisinniartarneq Kalaallit Nunaanni ukiuni uuntritilinni ileqquusimavoq. Piniariaaseq taanna sivisunerusumik sivikinnerusumilluunniit kaperlattarfiusuni sikuusartunilu piniartoqarfinni inukitsuni inuunnarnissamut pingaarutilerujussuavoq. Natseq qassutitut napitikkaangami ipineq ajorpoq piffissalli ingerlanerani ilisimajunnaartarluni kingornalu toqusarluni. Uumasut uumanermik annersaani immami uomasuusut nunami uumasut immamiinnerannitulli uippallertiginnginnissaat naatsorsuutigisariaqarpoq. Tamatumunnga uppersaatissaavoq natsiit qassutinik pisarineqarsimasut puamminnik imarmik immertoorsimanerat siumorneqarsimannngisaannarmat.

§ 13, imm. 2-mut

Imm. 2-mi aalajangersakkakut toqutitsinissamut maleruagassanik erseqqinnerusunnik, matumanittaaq toqoraanermut atatillugu, allaffissornikkut aalajangersaanissamut Naalakkersuisut piginnaatinneqarput. Toqutitseriaatsit allat, taakku atornerarneri uumasumut toqutitsinermi pinngitsoorneqarsinnaanngitsumit naalliutsitsinerusinnaasut, inerteqqutigineqarnissaannut killiliivigineqarnissaannulluunniit maleruagassanik aalajangersaanissamut Naalakkersuisut aamma piginnaatinneqarput.

§ 14-imut

Paragraffimi oqaaseqatigiit siullerni aalajangersagaq Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumit nuussaavoq uumasunullu tamanut atuutsinneqalerluni. Imm. 1-imi aalajangersagaq Uumasut nakorsaattut ilinniagaqarsimannngitsut uumasut nakorsaasa suliaasaannik suliaqartitaasarnerat pillugu Kalaallit Nunaannut inatsimmik Veterinerdirektoratip nalunaarutaani nr. 331, 24. maj 1995-imeersumi uumasunik illersuineramik annertusiinertut isumaqarfigisariaqarpoq. Pilattaalluni passussinerit uumasut nakorsaannit aallaavittut isumagineqassapput, pineqanngillat passussinerit annikinnerusut annikitsuinnarmik anniaataasinnaasut qaangiutitertortussallu, assersuutigalugit neqqarinnerni ammillu ikianut kapuutinik kapuinerit nalunaaqtsersuinerillu aammalu uumasup uumaannarsinnaanissaa pillugu passussinerit kinguartinneqarsinnaanngitsut. Atuarneqarsinnaavoq naalliutit anniarnerrillu sapinngisamik killilerneqassasut. Tamatuma kingunerisaanik ilisimajunnaartitsisoqassaaq ilimagisariaqarpat ilisimajunnaartitsinikkut uumasup naalliunnissaa anniarnissaalu annikinnerulissasut.

§ 15-imut

Aalajangersakkakkut inerteqqutigineqarpoq pilattaanikkut isikkumik allannguinnissaq, ilaatigut ileqqorissaarnissaq pillugu ilaatigullu Kalaallit Nunaanni uumasuteqarnerup uumasut atorneqarsinnaanerannik tunngaveqarnera erseqqissarniarlugu, nutaaliornissaq pillugu isikkumik allannguisoqannginnissaa pinngitsoorniaannarneqanngilaq. Aalajangersakkami pineqartunut ilaapput pamiunik siutillu nuunik kipisisarneq.

§ 16-imut

Aalajangersakkakkut pilattaanikkut taamaaqataanilluunniit passussinerit, matumanittaaq nr. 1-imi taaneqartut, arlallit pillugit maleruagassanik allaffissornikkut aalajangersaanissamut Naalakkersuisut piginnaatinneqarput. Atortut ilaasa, assersuutigalugu kukiffannik killuinerit, atorneqarnissaasa akuersissutigineqarsinnaanerit pillugu maleruagassanik aalajangersaanissamut piginnaatitsissut periarfissiivoq. Kiisalu nr. 2-mi aalajangersakkakkut Naalakkersuisut periarfissinneqarput passussinerit aalajangersimasut taamaallaat uumasut nakorsaannit imaluunniit sulisunit ilinniagaqarsimasunit allanit isumagineqarnissaasa, kiisalu nr. 3 malillugu pilattaanerit taamaaqataanilluunniit passussinerit aalajangersimasut inerteqqutigineqarnissaasa allaffissornikkut aalajangernissaannut, tamanna passussinernut nr. 1-imi taaneqartunut aamma atuussinnaavoq. Nr. 4-mi aalajangersakkakkut uumasut pilattaanikkut isikkuinik allanngortinneqarsimasunik, tak. § 15-imi nassuiaatit, takutitassiarineqarnissaasa allatulluunniit takusassiarineqarnissaasa inerteqqutigineqarnerannik maleruagassanik allaffissornikkut aalajangersaanissamut Naalakkersuisut piginnaatinneqarput. Passussineq nunami allami inatsisinik unioqqutitsinani pisimasuusinnaavoq, tamannali apeqqutaatinnagu uumasut tamakku takutitassiarineqarnerat il.il. inerteqquteqarnermi siunertarineqartunut akerliussaaq.

§ 17-imut

Aalajangersagaq maannakkorpiaq pisariaqanngilaq ilanngunneqarlunili uumasuusivissuarnik, nunaminertanik uumasuusivinnik taamaaqataannilluunniit pilersitsisinnaanermut atatillugu uumasunik illersuineq isumannaallisaanermullu tunngasut eqqarsaatigalugit ilusiligaanissaasa ingerlanneqarnissaasalu piumasaaqateqarfigereernissaat pingaaruteqartutut isumaqarfigineqarmat. Akuersissummi ilusiligaaneranut ingerlanneqarneranullu piumasaaqatit saniatigut nakkutilliisussanik sulisussanillu ilinniartitsinissaq pillugu piumasaaqatinik aalajangersaasoqarsinnaavoq kiisalu akuersissummi piumasaaqatinik annertuumik uteqqiattumilluunniit unioqqutitsisoqarnerani akuersissut utertinneqarsinnaalluni.

§ 18-imut

Aalajangersakkap kingunerissavaa uumasut siunertamut taaneqartumut atorneqarsinnaannginnissaat, tamanna uumasunut annertuumik ajoqutaassappat. Tamaattumik illersuineq uumasup anniaateqartitaanissamut, naalliuteqartitaanissaamut ersiortitaanissamullu illersorneqarnissaanit pingaerneruvoq.

§ 19-imut141

Aalajangersakkami nr. 1-imi suliffeqarfiit taaneqartut ilusiligaanissaat ingerlanneqarnissaallu aammalu nakkutigineqarnissaat pillugit maleruagassanik allaffissornikkut Naalakkersuisut aalajangersaasinnaapput. Maleruagassanik allaffissornikkut aalajangersaasoqarsimagaluarpalluunniit akuersissummik pigisaqarnissap piumasaqaataanera atatiinnarneqartariaqarpoq. Ilusiligaanissaa pillugu maleruagassani takunnikiartortut isumannaallisaavigineqarnissaat eqqarsaatigineqartariaqarpoq ingerlanneqarnerallu pillugu maleruagassani nakkutilliineq sulisullu ilinniartitaanissaat pillugu piumasaqaatit ilaasariaqarlutik. Aalajangersakkami nr. 2 malillugu uumasut nujuillisarneqarnissaat, atorneqarnissaat imaluunniit annertuumik akornuserlugit takutitassarineqarnissaat, tak. § 18, pillugit erseqqissaataasunik maleruagassanik aalajangersaasoqarsinnaavoq.

§ 20-mut

Aalajangersagaq Qimmit qimuttut kiisalu qimmeqarnek qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq uumasunulli tamanut atuutsinneqalerluni. Aalajangersakkakkut meeqqat 16 ataallugit ukiullit uumasuuteqarnissaat inerteqqutigineqanngilaq, inersimasulli susassaqartut meeqqat uumasuutaannut akisussaaffilerneqarlutik.

§ 21-mut

Nr. 1-imi aalajangersagaq Qimmit qimuttut kiisalu qimmeqarnek qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq, taanna malillugu maleruagassat allaffissornikkut aalajangersakkat uumasunut allanut qimmiunngitsunut qitsuunngitsunullu aamma atuuttussanngorlugit. Aalajangersakkakkut uumasut nioqqutigineqarneranni maleruagassanik allaffissornikkut Naalakkersuisut aalajangersaasinnaanerat periarfissinneqarpoq. Aalajangersagaq taanna naapertorlugu maleruagassanik aalajangersaaneq pisinnaavoq assersuutigalugu sananeqaatit imaluunniit uumasunik illersuinermit mianerisassat tunuliaqutaralugit. Oqaatigineqassaaq uumasut nunalereq siunertaralugu uumasuutigineqartut, tak. imm. 2, pineqartunut ilaanngitsut. Oqaatsini

„nunalerineq siunertaralugu" pineqartunut ilaasinnaapput aalisakkanik tukertitsivinni aalisakkat aamma igutsaat tungusunnitsuliortitat.

Nr. 2-mi aalajangersakkakut qimminut sungiusaaviit, paarinniffiit, naparsimmaviit, tigumminnikkallarfiillu, uumasut suulluunniit pineqaraluarpata, ilusiligaanissaat ingerlanneqarnissaallu pillugit maleruagassanik allaffissornikkut aalajangersaanissamut Naalackersuisut periarfissinneqarput. Kiisalu suliffiit inuussutissarsiutigalugu allatut uumasunik niuerutiginninnermik ingerlatsisut pineqartunut ilaapput. Maleruagassat aalajangersagaq malillugu suliarineqartut akuersissummik pigisaqarnissamik piumasaqaammik, matumanittaaq taakkunani piumasaqaatinik unioqqutitsisoqarnerani akuersissutip utertinneqarsinnaanera pillugu, ilaqartinneqarsinnaapput. Kiisalu nakkutilliinissaq sulisullu ilinniartinneqarnissaat pillugit piumasaqaatit maleruagassani ilaatinneqarsinnaapput.

§ 22-mut

Aalajangersagaq Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumiit nuussaavoq uumasunulli tamanut atuutsinneqalerluni. Uumasut eqqunngitsumik pineqarnerat pillugu suliassani nakkutilliineq pillugu periusissat taaneqarput, pisunilu ataasiakkaani pissutsimut uumasut nakorsaannit naliliisoqartarnissaa qularnaarneqarluni.

§ 23-mut

Pissutissaatitaasut erseqqinnerusumik taasat tunngavigalugit uumasullu eqqunngitsumik pineqarpata imaluunniit inatsisip § 6-ani nr. 4 malillugu aalajangersakkatut aalajangersarneqartut unioqqutillugit uumasuutigineqarpata politiit akuliutilertornissaminnut periarfissinneqarnerat aalajangersakkakut qularnaarneqarpoq.

§ 24-mut

Kiisalu periusissat taaneqartut malinneqarnerisigut uumasut pisariaqanngitsumik naalliuteqassappata erngerluni toqutinneqarsinnaanerat qularnaarneqarpoq.

§ 25-mut

Pisuni peqqusissutigineqarsimasup tamatuma eqqartuussisunut suliassanngortinneqartarnissaanut periaasissat pineqarput.

§ 26-mut

Aalajangersakkap qularnaarpaa politiit eqqartuussisut akuersiseqqaanngikkaluarlugit pisariaqarfia naapertorlugu inatsisip aalajangersagaasa malinneqarnissaat qularnaarniarlugu nakkutilliinissamut. Aalajangersagaq uumasuuteqarnernut qanorluunniit ittunut atuuppoq, taannalu sumiiffinnut sunulluunniit uumasuuteqarfinnut, tassunga ilanngullugu angallassissutinut, atuuppoq.

Aalajangersagaq tassunga assingusoq Inuussutissanik nersutillu nappaataannik inunnut tunillaassorsinnaasunik nakkutilliineq pillugu Inatsisartut peqqussutaanni nr. 17-imi, 28. oktober 1993-imeersumi § 5-imi allassimavoq: *"Nakkutilliisoq kinaassutsiminut uppersaammik takutitsinikkut eqqartuussivimmiillu taamaaliornissamut piginnaatitsissummik peqanngikkaluarluni pisortat namminersortullu pigisaannut isersinnaatitaavoq inatsisartut peqqussutaat inaluunniit inatsisartut peqqussutaat naapertorlugu malittarisassiat naapertorlugit aalajangiinermut atatillugu paasissutissanik pissarsiniarluni"*.

Danskit uumasunik illersuineq pillugu inatsisaannut oqaaseqaatini, matumani aalajangersakkat taamatut assingusut ilanngunneqarfigisaani, allassimavoq: *"Justitsministeria aalajangiisinaavoq, uumasut sunniuteqarluartumik illersorneqarnissaat siunertaralugu, pineqatissiinissamut erseqqissunik pasitsaassisoqanngikkaluartoq eqqartuussisut akuersiseqqaanngikkaluarlugit politiit qanoq ilisukkulluunniit uumasuuteqarfinnut appakaassinnaanissaannut"*.

§ 27, imm. 3 aamma 4-mut

Aalajangersakkat taakkua aamma Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi atuupput, matumanili ilanngunneqarlutik uumasuutinut sunulluunniit tunngatinneqalerlutik, tamannalu Kalaallit Nunaanni nutaajuvoq.

Assersuutigalugu nunalerinermi piniarnermilu pissutsini arsaarinninneq pillaatissinneqartumut akuliuffiusinnaammat annertoorujussuaq suliani taama ittuni arsaarinninneq taamaallaat pisinnaasariaqarpoq qanoq iliuuseqarsimaneq aammalu tamatumunnga paasissutissat allat iliuuserisimasap uteqqinnissaanut aarlerinartoqartoqarneranik tunngavissaqartitsippata.

Imm. 4-mi oqaatigineqartutut uumasuuteqarsinnaanerup imaluunniit uumasuuteqarnermi suliaqarnermi inerteqquteqarneq akiliisitsinermik pillaatissiisutigineqarsinnaavoq. Matumani akiliuteqartitsineq § 27-imi, imm. 1 aamma 2 malillugit akiliisitsilluni pillaatissinermi annertunerujuunissaat naatsorsuutigineqarpoq.